

Paul, 'Udechoo 'Udustl'us Timothy Ts'ó K'e Yanguz-i

Paul, Timothy hadih yúlhni

1 ¹ Si Paul si cha Sizi Gri ba whel'a'-un 'ust'oh. Yak'usda, neulhyis-un, 'en ooghuni gha whel'a'-un susdli'. 'Ink'ez neMoodihti Sizi Gri oot'a niuznintan-un, 'en cha ooghuni gha whel'a'-un susdli'.

² Timothy ts'un be 'alha 'uhoont'oh-i 'i gha soo sye' inli. 'Ink'ez ndi 'udustl'us nts'o t'l'a s'aih-i, Yak'usda neBá 'ink'ez Sizi Gri neMoodihti, 'en gha ye unzoo-i be 'ugha te' nudzun-i, 'ink'ez be nedzi doghel-i cha, 'i 'ont'e' hukwa' nuszun.

Khuni whuts'it-i whuch'a khondle'

³ Macedonia yun k'ut ts'u tisyá whe keyoh Ephesus 'et nenyunusti. Soo cho 'ut'en 'utalh'el'h huba mba must'i. Whute, 'et za sinda. Daja nyudasni, 'et doo cha za nyudutasnelh, khuni ulhtus-i be whulohne dune whuts'it be dune hubohodoolh'eh 'et whuch'a.

⁴ 'Enne 'udada' buba 'alha' yint'oh, 'ink'ez lhelhdun butsoda'ne buba 'alha 'uhoont'oh-un. Ndoohoont'oh huwa hukwa lhdulhyoh 'uhudutni. 'Aw Yak'usda be 'ut'en k'oh iloh 'uhoont'oh. Be 'alha 'uhoont'oh-i Yak'usda negha inin'ai-i, 'i gha 'on nus ts'inzoo 'et huwa.

⁵ Budzi lhditsun, 'ink'ez buyo ts'e oogha t'ets'oninzun-i^a unzoo-i be cha, 'ink'ez 'i be buba 'alha' hot'e' cha, 'et whuz un'a lhk'e hootsi'. 'Inka ndi khuni Yak'usda netl'a ídan'ai.

⁶ 'Et whulohne 'ants'i iloh ts'e whehanya. 'Et huwa tank'us 'uhuja 'ink'ez la hoot'oh-un howu yahalhduk.

⁷ Ndunne Moses be 'udustl'us k'ut 'uk'u nusguz-i hubodutilh'eh hukwa' huninzun 'ink'ez daja hutni-un, 'aw t'ehonuszun 'et hoontsi' 'alha 'uhoont'oh hutni.

⁸ 'Et hoontsi' t'ets'oninzun Moses be 'udustl'us 'uk'u neyuzguz-i mbene la soo ts'ih'un un'a hiye 'ut'en te, 'enne buba yinzoo.

^a 1:5 Ndi khuni, "Neyo ts'e oogha t'ets'oninzun-i," 'i hoonli ts'ih'un un'a k'us tank'us 'úhoont'oh-un, 'i gha t'ets'oninzun, ts'utni whe' ts'utni.

⁹ Moses be 'udustl'us 'uk'u neyuzguz-i 'aw dune ts'ih'un 'unt'ohne ba lhe'it'oh 'et cha t'ets'oninzun. 'Ink'ez ndunt'ohne, 'enne buba' yilya mbene la 'i k'unekyuzuzne, ndi khuni netl'a dilts'ut-i 'aw hik'u nulhe'it'elne cha, budzi dutsunne cha, lubeshi 'ulh'enne cha, Yak'usda ghudlohne cha, ooze hoontsi'ne cha, duloo, dubáke ughanne, 'enne cha, dune ughanne cha,

¹⁰ ts'ekoo k'us dune bulh ninta' 'ut'ihne, whulohne dune dudulh dune ts'un bubeni untsi'ne cha, dune 'ulhnane cha, whuts'itne cha, dich'oh dughuni k'unuyuzne cha, 'enne Moses be 'udustl'us buba' yilya. Yak'usda ooghuni unzoo-i, 'i ts'iyaitsuk unzoo whe dune whubodulh'eh. 'Et 'udun huwa ts'ih'un khuni huyodil'e'-i, 'i hich'az ditni de, 'enne cha buba' yilya.

¹¹ Ndi khuni unzoo-i 'uk'enus dizti', 'ink'ez Yak'usda za unzoo-un, 'en ghun za 'unt'oh. 'Et st'a ninintan whe stl'a idan'ai.

Yak'usda ye unzoo-i, 'i gha uzdólhti'

¹² Gri Sizi neMoodihti 'en st'a ninintan whe 'ustus sulhtsi 'ink'ez de 'ut'en k'oh ooba' 'utist'elh-un, 'et stl'a hon'ai, 'et huwa 'en ts'un musi dusni.

¹³ Niz de ha oodanzut Yak'usda ch'az dasni 'ink'ez ooba 'alha 'uhoont'ohne, dzoh nubuzusde. Ts'iyanne ba dzoh 'udusni inle'. 'Et hoontsi' 'aw t'eoonuzuszun-un, sba 'alha' lhe'hoot'oh 'et huwa 'ist'en, 'et hoontsi' sgha te'duninzin.

¹⁴ 'Et neMoodihti ye sts'un unzoo-i tube lhai whe 'unt'oh, 'ink'ez Gri Sizi 'en ye nek'entsi'-i, be 'alha 'uhoont'oh-i, cha lhai whe yut'i.

¹⁵ Ndi khuni be nyulh yaduk-i, 'i 'alha' 'unt'oh 'ink'ez 'i soo ts'iyawh oot'a ninintan, 'et ndutni: Gri Sizi 'en ndi yun k'uz nusiya lubeshi 'ulh'enne bubutilhyih wheni, 'ink'ez si 'uk'enus dune unsi'-un usdli inle'.

¹⁶ 'Et hoontsi' Sizi Gri, 'en sgha te'ninzin. 'Et 'ink'ez 'en ba 'udechoo 'oh te ne'ust'en-un oosdle'. 'Et huwa sgha te'ninzin. Ndunne 'awet nilhdukw buba 'alha' yint'oh whe 'ilhiz hukhutinalh-un hotit'elh, 'enne whubunilhtan-un usdli.

¹⁷ 'Et 'andit ndun 'ilhiz wheni whulerwe unli-un, 'en ba ts'odilhti'. 'En 'uk'enus dizti'-un unli. 'En 'unt'oh dalhtisa 'ink'ez 'aw ts'oo'en ait'oh. 'En za Yak'usda whunih-un unli. 'En 'ilhiz wheni ba ts'odilhti'. 'Et ndo honeh.

Netsudule soo cho be óonyaih

¹⁸ Timothy sye' inli. Di khuni ulhtus-i Yak'usda be nus hoo'enne, 'uda' nghu yahalhduk inle', 'et si cha whuz un'a ntl'a hoos'ai. 'I be netsudule ch'a ts'ih'un un'a bube óonyaih.

¹⁹ Be 'alha 'uhoont'oh-i 'ink'ez nyo ts'e oogha t'ets'oninzun-i ndi 'ut'en wheni, 'i be soo ubontun. Whulohne bubeni toh yudziz'ai-i, 'i ts'iyawh hukwa lhe'hunizun. 'Et huwa be buba 'alha 'uhoont'oh-i ninta' honilh'en.

²⁰ Ndunne Hymenaeus 'ink'ez Alexander 'enne duhulya. 'Enne Yak'usda ch'az yahalhduk. 'Et t'ehonozin ndulhuhoost'en ha, 'et huwa Satan^b tl'a bisti inle'. Ts'iyanne ba tenadondli.

2 ¹ 'Et huwa soo cho nyudusni, 'udechoo Yak'usda ts'un ts'iyanne buba oots'u tedindli. 'Et whuz un'a bula tit'elh, 'ink'ez Yak'usda ts'un musi dini.

² Lerwene cha 'ink'ez ts'iyawh neando 'unt'ohne cha buba tenadindli. 'Et de la t'ezdusni 'ink'ez nedzi doghel whe ndi yun k'ut uzdolts'i'. 'Et Yak'usda ba ndi yun k'ut uzdolts'i' 'ink'ez ts'iyanne ba ts'inzoo oole'.

³ 'Et whuz un'a yinka uzdilhts'i-un, 'et hoonzoo whe' hoont'oh 'ink'ez Yak'usda neulhyis-un oonalh nduts'oot'e'.

⁴ 'En ts'iyanne butilhyih hukwa' ninzun 'ink'ez khuni 'alha' 'unt'oh-i t'ehinoozeh ha.

⁵ Yak'usda 'ilhoghun za unli. Yak'usda 'ink'ez ndi yun k'ut dilhts'ine hubulheguz 'ilhoghun buba yalhduk-un za unli, ndun dune Gri Sizi 'en 'unt'oh.

⁶ Wheni ts'iyawh naneootakulh ha butl'a' dudilti. Ndet la whusahoolts'ut-un soo 'et 'uja, ts'iyanne whunilhtan 'et whuz un'a.

⁷ 'Et wheni Yak'usda 'utahasalhti whel'a'-un tisdleh 'ink'ez ooba yatisduk ha. Si 'utisnelh 'udun yun k'ut whut'enne be 'alha 'uhoont'oh-i 'ink'ez khuni 'alha' 'unt'oh-i cha 'et whúbuntistun ha. 'Et Gri oonalh daja dusni 'alha' 'unt'oh-i be' dusni, 'aw lhozusts'it.

**Dune 'ink'ez ts'ekoo ooba 'alha 'uhoont'ohne
Yak'usda ba 'ilhunhodulh-un dahutit'elh-un**

⁸ 'Et huwa ndi yun k'ut ndulcho whe dunene tenahudoodli. 'Et bula lubeshi ooghu hooloh whe dodolnih. 'Aw huske bubeni toh hooloh 'ink'ez buba nawh lhe'host'e' whe tenahudoodli. 'Et whuz un'a buba hukwa' nuszun.

⁹ 'Ink'ez whuz un'a ts'ekoo cha ts'ih'un un'a whe soo nahudoot'ih. Huwhunih hukw'un'a soo hudoot'e', buyust'e ts'iyawh ook'e 'uzdla hukw'un'a. Dutsigha' lhat te cho nahídoolhtsi' junih. Gold, k'us kw'usul nehídilya-i, k'us naih 'on nus dizti'-i, 'et ndóohoont'oh-un 'et huwa whulohne dune tank'us hunint'i, 'et huwa 'utni,

^b 1:20 Ndun Satan 'en netsudule unli.

10 'et hoonts'i ts'ekoo, Yak'usda ts'un teni nilhdzunne, 'ut'en unzoo-i 'uhutilh'elh, 'i be, 'et whuz un'a ts'ekoo soo ot'enne hutileh.

11 'Et ts'ekoo dune butl'a' hududoolyelh 'ink'ez t'ehudusnih whe O Yak'usda ooghuni huyodool'eh.

12 'Et ts'eke 'aw dune hodoolh'eh ha, 'ink'ez yumoodih oole' ha ootl'a lhuwhus'al. 'Ink'ez t'edoosnih huba' hoont'oh.

13 Yak'usda Adam 'en cho 'uyinla, 'et hukw'elh'az Eve 'inla 'et huwa.

14 'Ink'ez Adam 'aw nalhnit'oh, k'us ndun ts'eke 'en nainan'a 'ink'ez tank'us 'uja.

15 'Et hoonts'i ts'ekoo ts'ih'un un'a dudeni be khuhudli whe be 'alha 'uhoont'oh-i hut'i, Yak'usda k'e hintsi', 'ink'ez buyust'e lubeshi ooghu hooloh de, 'et ndihint'oh de, buyaz whulhih te hudutijih.

Yak'usda ba huwunli-un, 'et diz un'a dune oole' huba' hoont'oh

3 1 Ndi khuni oot'a niuznintan-i 'et ndutni: Mbe la Yak'usda ba huwunli-un tileh hukwa' ninzun de, 'et de 'en 'ut'en unzoo-i 'utilh'elh hukwa' ninzun whe 'unt'oh.

2 'Ink'ez Yak'usda ba huwunli-un, 'aw dune hoonli whe tank'us lhe'oost'e'. 'Ilhoghun za oo'at oole'. Duba whutnih. Ts'ih'un ni nizulh. Dune yoh dalih. Soo dune hodulh'eh-un unli,

3 'ink'ez ts'ekoo too' cha ha dalhatni. 'Aw khun lhonulhch'e cha 'unt'oh. 'Aw sooneya ha dalhatni. Dune dach'e nulhe'ust'en. Dune dulhyoh lhe'dusnih. 'Uyoonne dune ch'e' ha lhe'nizun.

4 Ts'ih'un un'a duyoh dilhts'ine bughole' 'ink'ez duduzke cha dich'oh budzi be hik'une' 'ut'en uboolhtselh.

5 'Et ts'ih'un un'a duyoh dilhts'ine bughunli 'aw t'eeonuszun de, nts'en'a Yak'usda ba 'ilhunaoodulhne bughu tileh?

6 'Aw 'andit ooba 'alha' hooja-un iloh oot'e'. Doo ka si ut'udilti-un oole', 'ink'ez netsudule be ooba nahisda-i, 'et doo ka la didut cha whuz un'a ooneh.

7 'Ink'ez cha ndunne ooba 'alha' lhe'hoot'ohne, 'enne cha soo highu yaoolhduk, doo ka si tank'us 'uja 'ink'ez netsudule yoolhgooh.

Yak'usda ba ne'út'en-un, 'et nts'en'a dune tileh

8 Whuz un'a za Yak'usda ba ne'út'en hukwa 'ut'enne, 'enne Yak'usda buba dóti!. 'Aw nanki bughuni lhiloh. 'Aw ts'ekoo too' cha ka dalhatni, 'ink'ez 'aw sooneya cha ka dálhatni.

9 'Et whe' hoont'oh hooyoh-un, be neba 'alha' whutat'elh 'i bulh, buyo ts'e oogha t'ets'oninzun-i, soo ootsun hooloh 'et ha hotun.

10 'Et hoonts'i ndunne Yak'usda ba ne'út'enne, 'udechoo soo cho dune t'ebunoozeh 'ink'ez 'aw hoonliyaz whe hik'e ho'alh-un hooloh de, 'et de Yak'usda ba ne'tit'en.

11 Whuz un'a za bu'atke cha Yak'usda buba dóti', 'uyoonne ch'az yalhoooolhduk, duba whutnihne hoole', ts'iyantsuk whe but'aniuznootan ha.

12 'Ink'ez ndunne Yak'usda ba ne'út'enne, 'ilhoghun za oo'at oole'. Duduzke 'ink'ez duyoh dilhts'ine cha ts'iyawh ts'ih'un un'a bughole' huba' hoont'oh.

13 Mbe la soo Yak'usda ba ne'ust'enne, 'uyoonne toh soo cho Yak'usda ba hooyin, 'ink'ez Gri Sizi ye 'alha' 'unt'oh-i, 'aw whelhnijut whe 'i ghun 'uyoonne bulh yaoolhduk.

Hooncha whe' hoont'oh hooyoh-un

14 'Awet nilhdukw nts'un tisyalh hukwa' nuszun 'et hoonts'i nts'o k'e' usges.

15 'Et hoonts'i sa'yaz ne'zust'en de, 'et de ndi 'udustl'us 'i gha la t'eeononzin whe Yak'usda ooyoh dahutit'elh-un. Yak'usda gha 'ilhodulhne, 'enne Yak'usda khuna-un ooyoh hinli whe' hint'oh. N dunne 'ilhunaoodulhne ndi khuni 'alha' 'unt'oh-i be highunli 'ink'ez ts'ih'un un'a highu yalhduk.

16 'Ink'ez 'aw huwun lhdulhyoh lhe'ts'udusnih whe Yak'usda ba ndi yun k'ut uzdolts'i' ha, 'et hooncha whe' hoont'oh. 'Et Yak'usda dich'oh dune suli' 'et whe whubunilhtan. Ndoni ts'ih'un 'unt'oh unli yulhni. Lizasne huyan'en. 'Udun yun k'ut whut'enne, 'en ghun whulh 'uhudants'o. Ndi yun k'ut whut'enne, ooghun ooba 'alha' yint'oh suli', 'ink'ez yak'uz ts'e huhoont'i' whe danahinilhti.

Whuch'a nahusdilh whutáleh-un

4 ¹ 'Et Ndoni soo ts'ih'un un'a ts'et gaih yalhduk whe ndutni, k'at le ntsi'-i nududehne whulohne dune nabunti'ah. 'Et huwa ndet la whubodutilh'eh-un, 'et za huhootuzalhts'ilh. 'Ink'ez ndi be 'alha' 'uhoont'oh-i, 'i hila dutitnih whe' hoont'oh,
² duba na'udzoo' whe whuts'it-i be za yahalhdruk. 'Et buyo ts'e oogha t'ets'oninzun-i 'ants'i kwun be k'e yiguz le' hut'ih,
³ lhghu dutalhts'ilh-un, 'et cha whuch'a hontayoot, 'ink'ez whulohkhi 'ut'alh-i, 'i cha hich'a buntáyulh. 'Et hoonts'i ooba 'alha' 'uhoont'ohne 'ink'ez khuni 'alha' 'unt'oh-i t'eininzunne, 'enne hika' ninzun-i ts'iyawh huyoo'alh huba' hoont'oh, Yak'usda 'uyinla 'et huwa. 'Et ndi t'alh-i ha Yak'usda ts'un musi hudooni' 'ink'ez huyoo'alh.

4 Yak'usda 'uyinla-i, 'i ts'iyawh 'uzoo' whe 'unt'oh, 'ink'ez ookwa lhe'ts'unooszin junih. 'Et huwa Yak'usda ts'un musi ts'utni 'ink'ez ts'oo'alh.

5 Yak'usda ooghuni 'ink'ez tenadudli bulh 'i be neba unzoo 'ulhieh whe ts'u'alh.

Sizi Gri ba soo ne'ut'en-un 'onle'

6 Lhulhutsinke unline, 'enne Yak'usda ghun hubodilh'eh de, 'et de la Sizi Gri ba soo ne'út'en-un tanleh. 'Ink'ez ndi khuni be 'alha 'uhoont'oh-i, 'i ghun t'oonanzin, 'ink'ez 'i soo cho ook'une' zint'en.

7 'Et hoontsi khuni lhizoo'-i, 'ink'ez lait'oh-i khuni, 'i oozólhts'ai' junih! K'us Yak'usda ba ndi yun k'ut uzdolts'i' ha, 'i be ilhtus 'onle'.

8 'Et neyust'e ba ne'uzdunuldze' te, 'atsul za neba hootazoo', 'et hoontsi Yak'usda ba ndi yun k'ut uzdolts'i' ha, 'et ts'iyantsuk whe whudízi'. 'I gha la ndi yun k'ut uzdilhts'i-un nela' 'ewhudutit'elh 'ink'ez yak'uz neztiyalh 'et cha nela' 'ewhudutanelh.

9 Ndi khuni be nyulh yasduk-i, 'i oot'a nínontan 'ink'ez itálhchulh huba soo 'uldzoo' whe 'unt'oh.

10 'Et wheni 'uts'ut'en 'ink'ez dzóh nuts'udeh. Yak'usda khuna-un, 'en oot'a niuznitan 'et huwa. 'En ts'iyanne butilhyis hukwa' ninzun, ndunne yuba 'alha' yint'ohne, 'enne soo ubulhyis.

Yak'usda ba ne'int'en-un, soo cho howinli

11 'Et ndohwhi 'ubudini 'ink'ez hubodilh'eh.

12 Chilh inli hoontsi 'uyoonne ba 'ants'i 'onle' junih. K'us ooba 'alha 'uhoont'ohne, nyun nyuhunilh'en de, 'et huwa huhodool'eh. Ndai khuni be yailhduk-i, 'i be nts'en'a la ndi yun k'ut sinda, nts'en'a la 'uyoonne k'e intsi', nyughi be cha, mba 'alha 'uhoont'oh-i, 'i cha, 'ink'ez nts'en'a la lubeshi ch'az 'un dunilt'i cha. 'Et 'ohwhi be sih ooba 'alha 'uhoont'ohne whubunolhtun.

13 'Et ndet la nts'un tisyalh whuts'un, khun ndi Yak'usda ooghuni buba ook'u yailhduk-un, 'et 'etsul lhe'duzonih. Khuni be hoolhtus ha be bubulh yailhduk, 'ink'ez khuni ts'ih'un un'a 'i be hubodulh'e.

14 'Et 'oh da' ndunne 'utso whudilhdzulhne dula ntsi k'ut hudalni. 'Et whe mba nus huhon'en 'ink'ez 'i nghant'ai-i 'ants'i mba oole' junih.

15 'Et njan howun nuni ninzut 'ink'ez whutl'a'dudiltih. 'Et de la oot'az ninyeh-i, ts'iyanne hinoohl'en.

16 Nyunch'oh soo cho khindli 'ink'ez khuni be whuts'odul'eh-i cha. 'I be bulh za 'ont'e'. 'Et ndint'oh de, 'et de nyunch'oh 'uduzilyih 'ink'ez ndunne nyudits'one, 'enne cha ubalhyiz whe 'int'oh.

Yak'usda ba 'ilhunaoodulhne, soo cho né'bilh'en

5 ¹ Dune nyanus whudilhdzulh-un hoonli hukwa dóni' junih. K'us mbá k'un'a bulh yailhduk. Dune nk'oh whudilhdzulhne, nyulhutsinke k'un'a bubulh yailhduk.

² Ts'ekoo nyanus whudilhdzulhne, nloo k'un'a bubulh yailhduk. 'Ink'ez ts'ekoo nk'oh whudilhdzulhne, nyulhtuske k'un'a khuni ootsun hooloh-i be bubulh yaoolhduk.

Mbene la soo tsandilh unline ubuzdólhti'

³ Ndunne soo ts'ih'un tsandilh unline, 'enne cha ubudólhti'.

⁴ 'Et hoonts'i ndunne tsandilh buzkeh hoonline, k'us oochaike hoonline, ndunne tsandilh yuts'u haundene, 'enne duloo ts'ih'un un'a highole'. 'Et whe Yak'usda be 'ut'en k'oh whutaleh. 'Et 'udechoo duyoh dilhts'ine bubodólhti', 'ink'ez dudusneke bula' hoot'en. 'Et hoonzoo whe' hoont'oh 'ink'ez Yak'usda buts'u hukwa' ninzun.

⁵ Ndun soo ts'ih'un tsandilh unli-un 'ink'ez oonat 'e hooloh de, Yak'usda t'anintan yula' tit'elh huba. 'Et dzin 'ink'ez 'ulhdzis ibulh Yak'usda ts'un teni' nilhdzun whe tenadudli.

⁶ 'Et hoonts'i tsandilhne, dich'oh duk'un'a za whe ndi yun k'ut usda, ndunt'ohne hukhuna whe dahuzsai whe' hint'oh.

⁷ Daja nyudasni' la 'i khuni ulhtus 'i be ts'iyanne bubulh yailhduk. 'Et whe buk'e holts'it-un hooloh.

⁸ 'Et hoonts'i mbene 'aw dunatneke ghu lhilohne, 'ink'ez duyoh dilhts'ine, 'enne ghu lhuhiloh de, 'et ndunt'oh-un ndi be 'alha 'uhoont'oh-i yuch'az nal'alh, 'ink'ez ooba 'alha' lhe'hoot'ohne ba nus lhe'hizoo' whe 'unt'oh.

⁹ Tsandilh lkh'u tat whunizyat 'on 'un be yus k'ut (60) de, 'ink'ez 'ilhoghun za ghinda' de, 'en za boozil' 'uk'oguz huba' hoont'oh.

¹⁰ Unzoo-i 'ut'en 'ulh'en ooghu t'eohunoodzun. Ts'oodunne nilhyai de, dune t'ebunuszunne, 'enne hoonts'i yoh dabulih, Yak'usda ooch'e'ne buke tunagus, dzoh nuzutne la 'ut'en de, 'et ndi 'ut'en unzoo-i soo cho ts'iyawh 'uyalh'en de.

¹¹ 'Et hoonts'i ndunne tsandilh t'et unline, 'enne buboozi' 'uk'eonges junih. 'Ut'en ntsi'-i ha' huninzun suli', 'ink'ez Gri ch'az nahulh'a de, ki hutit'elh hukwa' huninzun.

¹² 'Ink'ez 'udechoo dughuni huye nahizya-i k'ahinínyuz de, 'et de buba nahutideh.

¹³ 'Ink'ez cha tsehudutni-un huhodil'e' 'ink'ez kwun toh nuhuya. 'Ink'ez 'aw tsehudutni za iloh, 'ughu yahulhduk 'ink'ez 'uyoonne

e'ut'en k'oh huwu hinli cha' hint'oh. 'Aw ne'hudooni' huba lhe'hoot'oh, 'oh te ne'huduni'.

14 'Et huwa butsu hukwa' nuszun, ndunne tsandilh 'aw yoo 'un lhiszuhlne, ki náhoot'e! 'ink'ez bubuzkeh hole', 'ink'ez duyoh cha huwo hoole'. 'Et njan nduhut'en de, 'aw nech'az ditni-un yatilhduk-un ooghá holts'it ait'oh.

15 Whulohne 'uda' Sizi Gri hich'az nalh'a whe Satan hik'une' 'ut'en 'et huwa.

16 Mbe dune k'us ts'eke 'en ooba 'alha 'uhoont'oh unli-un, 'ink'ez ooloo tsandilh unli de, 'et de ndai la ye ndunidzit-i, 'i be bula' hoot'en. 'Et whuz un'a 'onghohne Yak'usda ba 'ilhunaoodulhne hoonliyaz bugha hoo'alh ait'oh. 'Et nduhut'en de, 'et de la soo ts'ih'un tsandilh unline, ndai hiye ndunidzit-i, 'i be bughu hoole'.

Mbene la netso whudilhdzuhlne ubuzdólhti'

17 Netso whudilhdzuhlne soo dune tso nuyane, nawh whe ubudólhti'. Mbe 'ut'en ulhtus-i be 'ut'en whe Yak'usda be 'ut'en k'oh dune hodulh'eh 'ink'ez Yak'usda ooghuni be yalhdukne, 'enne 'uk'enus soo ne'boolh'en.

18 Yak'usda ooghuni 'et cha ndutni, “Ndet la musdoos dune t'l'o mai' 'uzti'ulh wheni 'uyulh'en te, 'aw 'uti'ulh whuch'a 'enol'a' junih.” 'Ink'ez 'et cha ndutni, “'Ut'en-un be 'ut'en ooba 'uk'elha whutaleh whe' hoont'oh.”

19 Nduwe 'utso whudilhdzuhlne hoonli huwun buk'e huhoot'alh de, 'et nane k'us tane te, 'enne hiyulh t'ewhuninzun de, 'et de za huwu yahoolhduk huba' hoont'oh.

20 Mbene la lubeshi ilhchootne, ts'iyanne nalh whe ninta' hant'en-un hukwa' bodóni' huba' hoont'oh. 'Et de la 'onghohne whe hunooljut.

21 Yak'usda cha, Sizi Gri neMoodihti cha, 'ink'ez lizas 'utahalyane cha, 'enne ts'iyawh bunalh soo ts'ih'un un'a nyudusni, ndi khuni be daja nyudasni' 'et huwa 'ilhiz oole' ontun. Nda la 'utalh'elh-i, 'i ts'iyawh dune dach'e hole' hukw'un'a 'oneh junih. 'Ink'ez 'aw 'ilhoghun za k'entsi' 'ink'ez hoonli oots'u nolht'i junih.

22 Soo 'a dune k'e dolnih junih. 'Ink'ez 'uyoonne lubeshi 'ulh'enne e'ut'en bubulh 'oneh junih! Nyunch'oh lubeshi yit 'ududoldzin.

23 'Et lhat whe mbut gha ndinda, 'et huwa 'aw too za ontnai' junih, ts'ekoo too' nt'um-iyaz ts'ekoo too' ontnai'.

24 Whulohne bulubeshi ts'iyanne yunilh'en, 'et huwa ndai la ye buba nahutideh whutso, 'i dahaja la, ts'iyanne t'ehontazin. 'Ink'ez whulohne bulubeshi nahinu'i, 'et hukw'elh'az ndai la ye nahizya-i, 'i dahaja la, ts'iyanne t'eyuntizeh whe' hoont'oh.

25 'Ink'ez whuz 'un'a za mbene 'ut'en unzoo-i 'ulh'enne ts'iyanne t'ewhuntizeh 'ink'ez 'ut'en unzoo-i nahinu'i de, 'i hoontsi' ts'iyanne t'ewhuntizeh.

'Ulhna unline, 'enne cha dumoodihne hubodólhti'

6 1 'Et mbene 'ulhna unline cha dumoodihne ts'ih'un un'a bughu nuni hunoodeh whe soo cho ubodolhti'. 'Et nduhut'en de, 'et de Yak'usda boozii' 'ink'ez ye whubodalh'e' 'i cha 'aw 'uyoonne yuch'az dotni ait'oh.

2 'Et 'ulhnane bumoodih ooba 'alha 'uhoont'oh hinline de, 'enne butsu' hudootni junih, lhulhutsinke hinli 'et huwa. K'us ndunne 'ulhnane, 'enne 'on nus ulhtus-i be buba' hut'en. N dunne bumoodihne, 'enne Sizi Gri ghun ooba 'alha' yint'ohne hinli 'ink'ez buk'entsi'. 'Et huwa 'on nus ulhtus-i be buba' hut'en whe dude 'ut'en be bula' hut'en whe' hut'en. 'Et ndi khuni be nyulh yasduk-i, 'i 'uyoonne soo cho hubodilh'eh 'ink'ez budzi dona' 'inleh.

Sooneya nohyak'usda oole' junih

3 'Et dune whuts'it be dune hodulh'eh-un, 'en Sizi Gri neMoodihti ooghuni unzoo-i italhchulh hukwa lhe'nizun-un. 'Ink'ez Yak'usda ba ndi yun k'ut uzdolts'i' ha hukw'un'a ubodutilh'eh hukwa lhe'nizun de,

4 'en dune 'ududilti' whe 'unt'oh. Hoonli t'oonuszun. 'Et huwa 'ahoolhyiz dune dach'e za 'udinelh 'ink'ez khuni ghun dune dulhyoh 'utni. Ndunt'ohne dune 'oonih ooghu diz'ai whe 'uhint'oh. 'Uyoonne cha dulhyoh 'uhutni, khuni ntsi'-i be 'uyoonne cha ghu yahalhduk. 'Et 'uyoonne lubeshi e'ut'en za ghu nuni hunudeh.

5 N dunne bubeni ntsi' suli' whe 'ahoolhyiz lhdulhyoh 'uhunudzun. Khuni 'alha' 'unt'oh-i lhuhit'i'. 'Enne 'uhuninzun mbe la Yak'usda be 'ut'en koh hukw'u ne'ut'en-un, 'en 'utinih hoonzoo' tinelh. Ndunt'one buch'az nasindaih.

6 'Et soo ts'uhoont'i' whe Yak'usda be 'ut'en k'oh 'uts'uwhulh'en de, nedzi hoont'i' whe 'et neba 'uk'elha whuzdli' whe' hoont'oh.

7 Ts'uwhuzdli' da', 'aw hoonliyaz whusalhts'ilel, 'ink'ez 'alha' neba dzin whula toh suli' de, 'aw hoonli 'uztoola' ait'oh.

8 'Et huwa 'ut'alh-i 'ink'ez be dune tsinli-i ts'ut'i de, 'et neba soo' hot'e'.

9 'Et hoontsi' ndunne hoonzoo' tinelh hukwa' ninzunne, 'enne whunih ooghu lhdi'ohne 'ink'ez hoonli hiye ninta' tit'elh, 'i 'aw 'i za highu nuni nudeh. 'Et whula gha ts'e yo ubonilht'i 'et whe ndi yun k'ut hudilhts'i-un ninta' whutat'elh 'ink'ez hoontsi' ts'e hutidulh.

10 Sooneya ooba diti-i, 'i lhat-un hoontsi' oogha whe' whududit'ih. 'I gha whulohne dahatni k'et be 'alha 'uhoont'oh-i ch'a hudulh 'ink'ez lhat-un budzi unduda-un khaná huwhut'ai.

Dune hodilh'e-un cha 'ink'ez nyunch'oh cha soo cho khondle'

11 'Et hoontsi Timothy Yak'usda oodune' inli. Nyun ndowhi, 'i ooch'a tilgaih, 'ink'ez be ts'ih'un 'uhoont'oh-i, be Yak'usda k'une' whut'en-i, be 'alha 'uhoont'oh-i, be nek'ets'intsi-i cha, be whulh ts'uzyin-un cha, 'ink'ez be yo 'uzdudildzun-i cha, ndi 'i ts'iyawh whunanyalh hukwa 'int'en.

12 Neba 'alha' 'unt'oh-i, 'i gha 'on 'un 'oneh ait'oh whe hukwa 'int'en. Nyun cha 'on 'un ooneh ait'oh-un hukwa 'ont'en. 'Ilhiz be ts'ukhuna-i, 'i duts'o cho hontun. Nyun cha dutanjih ha nka hisda 'et huwa. 'Ink'ez lhane nalh soo hoonzoo-un budani'.

13 'Et Yak'usda oobut nyudusni ts'iyaitsuk khuna 'ink'ez Gri Sizi 'en Pontius Pilate oonalh soo hoonzoo-un dunne budani'. 'Et huwa Yak'usda 'ink'ez Gri Sizi 'en nalh soo cho nyudutasnelh,

14 khuni ntl'a dís'ai-i ookw'une' 'ont'en. Khun naoolts'it junih. 'Uyoonne dzoh ts'e nghu yahutilhduk, 'et 'oh te ne'ont'en junih. 'Et neMoodihti Sizi Gri whusatiyalh whuts'un, 'et za ndont'e'.

15 Sizi Gri whuz de tiyalh-un, ndet 'uwhutanelh, 'oh de neMoodihti 'en hukwa' ninzun-un 'uwhutanelh. 'En 'uk'enus unzoo 'ink'ez neMoodihti 'en za k'une' 'ut'en-un unli. Lerwene ts'iyawh bulerwe unli 'ink'ez moodihne cha ts'iyawh bumoodih unli.

16 'Aw 'en za be dalhts'utsa-i yut'i. Ndet usda-un, 'et ndi oots'u ha yanduz-i, 'aw dune yuzih neooya' ait'oh. 'Aw dune lhuyis'en 'ink'ez 'aw dune yoo'enne hooloh. 'Aw 'en za 'ilhiz be hoolhtus-i yut'i. 'Et huwa uzdilhti'. 'Et ndo honeh.

Hoonzoo' 'unt'ohne 'ududólhti' junih

17 Ndi yun k'ut hoonzoo' 'unt'ohne, 'enne khuni ulhtus-i be budoni', 'aw ndi yun k'ut be' hoonzoo' ts'int'oh-i hoonli lhiloh. 'Aw sooneya oot'a ninintan-i iloh 'unt'oh. 'Et k'us Yak'usda mbe la khuna-un, 'aw 'en za oot'a ninohtan. Yak'usda 'en oola hoonli whe ts'iyaitsuk be ts'ohot'e' ha negha yunleh.

18 Ts'ih'un un'a 'uhoot'en budoni'. Bula hoonli whe 'ut'en unzoo-i 'uhoolh'en. 'Ahoohyiz 'uyoonne hiye ndunidzit-i, 'i be bula' hutit'elh-un huba lhahúdoot'e'. Soo hoont'i' whe lhata's'oolyelh.

19 'Et nduhut'en de, 'i be ndo yak'uz diziti-i dich'oh duba 'ilhe'hosdle, whusaootilts'ulh-un wheni. 'Et de 'ilhiz be ts'ukhuna-i huyitálhchulh.

Be 'alha 'uhoont'oh-i soo cho ooghonle'

20 Sye' Timothy ndi khuni ntl'a dis'a-i, 'i soo cho ook'une' tant'en, 'et wheni 'usdla. 'Ants'i 'oh neyalhdukne 'ink'ez Yak'usda ch'az yalhdukne, khun buzih nonya' junih. Ndunne whuz un'a yalhdukne, t'ehoninzun huninzun hoonts'i, 'enne nech'az ditnine hinli.

21 'Et huwa be 'alha 'uhoont'oh-i whuz un'a highu yalhdukne, 'enne tank'us hidulh whe' hutni.

'Et Yak'usda ye unzoo-i, 'i nyulh oot'e'. 'Et ndo honeh.